

Konxe Bus Direitu - Sirvisus di Transpórti pa Idukason Spisial (Otokarus, Monitoris & Sirvisus Rilasionadu): Kuzê ki Karta Di Konkluzon Risenti Signifika Pa Bu Família?



Sistéma di Rizoluson di Problémas (PRS) di Dipartaméntu di Ensinu Báziku y Sekundáriu (DESE) imiti un Karta di Konkluzon dia 24 di febreru di 2023, y el atxa fadjas di transpórti na sistéma interu pa alunus di Boston Public Schools (BPS, Skólas Públiku di Boston) ki ten difisiéncias, violandu direitus di alunus y famílias. BPS ten ki faze más pa oferece bu alunu sirvisus di transpórti nisisáriu.

Si bu ten un alunu ku un Prugrama di Ensinu Individualizadu (IEP) ô planu 504 ki ta nisisita di sirvisus di transpórti (pórta-pórta, monitor di otokaru (1:1, jeral ô formason na konvulson) nton **bu ten direitus:**

- Direitu a pusíveis sirvisu di idukason di kompensason, si bu alunu perde óras ô dias di ses sirvisu di idukason spisial ô si es tivi problémas rípididu ku ses sirvisu di otokaru (Spia #2)
- Direitu di ser rienbolsadu, si bu tivi ki transporta bu alunu pa skóla (Spia #3)
- Direitu di resebe notifikason pur skritu, y na óra, sénpri ki sirvisu di transpórti di bu alunu for interonpidu ô inadekuadu
- Direitu a un monitor di otokaru ô otu pisual di otokaru ki konxe nisisidadis individual di bu alunu y ki ten formason adekuadu

1. Bu alunu ku un IEP ô Planu 504 foi afetadu pa sirvisus di transpórti di BPS interonpidu ô inadekuadu entri 17 di otubru di 2021 y oji?

IZÉNPLUS

- Bu alunu ta meste un monitor (jeral ô 1:1) y otokaru ka tinha ninhun monitor ô tinha un monitor “di rizérva” tudu dia
- Bu alunu ta meste un monitor 1:1 y otokaru tinha sô un monitor konpartilhadu
- Monitor ka konxeba nisisidadis individual di bu alunu y/ô el ka tinha formason

2. Bu alunu txiga na skóla atrazadu ô el perde dia(s) interu di aula pamódi problémas di transpórti (izénplu: otokaru atraza, ka tinha otokaru, ka tinha monitor, ka tinha sintu di siguransa, etisétra)?

IZÉNPLUS

- Bu otokaru atraza rípidamenti pa buska bu alunu ô pa dexa-l na skóla Your student requires a 1:1 monitor and the bus only had a shared monitor
- Bu otokaru staba dispunível, má bu alunu ka konsigi entra na otokaru pamódi ka tinha un monitor, sintu di siguransa, ô otu probléma

Si bu risponde sin na 1 ô 2, BPS ten ki trabadja ku bo pa rizolve problémas di transpórti di bu alunu. BPS ka pode sta konstantementi ta poi bu alunu ta perde óras ô dias di aula y BPS pode ser obrigadu a oferece bu alunu sirvisus di “rikuperason”. Kuzê ki bu debe faze?

- Skrebe un lista di problémas y data(s) di kualker probléma(s) di transpórti
- Si pusível, manda bu lista pa email di Diretor di skóla y Kordenador di Idukason Spisial (COSE) di bu alunu; kumunikason pur skritu é sênpri midjor
- Pidi un riunion ku Ekipa di IEP pa fala sobri problémas di transpórti ki kontise na pasadu ô problémas atual, kontaktandu Diretor di skóla ô COSE di bu alunu (spia #4 pa problémas atual)
- Pruveta riunion ku Ekipa di IEP pa:
 - Konversa sobri sulusons di kurtu-prazu y di longu-prazu pa kualker probléma di transpórti atual. Pidi skóla pa dá-bu kes suluson tenpuráriu li pur skritu
 - Fala sobri sirvisus di idukason di kompensason (sirvisus di “rikuperason”), bu alunu pode meste rikupera sirvisus ki el perde pamódi problémas di transpórti (izénplu: si bu alunu perde sirvisus di fala ô di akonselhaméntu, pidi pa rikupera kes sirvisu la)

3. Bu ranja transpórti pa bu alunu pamódi problémas di transpórti di BPS (izénplus na 1 ô 2 diriba) entri 17 di otubru di 2021 y oji?

IZÉNPLUS

- Bu leba bu alunu pa skóla na karu pamódi ka tinha otokaru, ka tinha monitor ô otokaru atraza
- Bu tivi ki manda bu alunu pa skóla na Uber, Lyft ô na taksi

Si sin, BPS sta obligadu a rienbolsa-u kel dinhéru ki bu gasta. Kuzê ki bu debe faze?

- Pidi rienbolsu: Bu pode ser rienbolsadu pa kilometrajen (na taxa stadual) y/ô pa kustu di sirvisus di transpórti alternativu ki bu ranja (sima Uber ô Lyft) désdi 17 di otubru di 2021. **Famílias sên númeru di siguransa susial ô un númeru di identifikason fiskal tanbe ten ki ser rienbolsadu**
- Bu pode atxa más instruson y formuláriu na pájina di internéti di BPS Reimbursement (Rienbolsu di BPS). Bu pode tanbe kontakta Linha di Ajuda di BPS pa númeru 617-635-8873 ô pa email: helpline@bostonpublicschools.org

4. Bu ten interupson di sirvisu di transpórti antirior ô atual? Si bu risponde sin pa kualker di kes pergunta diriba ô bu meste más ajuda:

- Manda un ticket atravê di portal di Transpórti di BPS, txomandu pa númeru 617-635-9520, ô schoolbus@bostonpublicschools.org
- Kontakta Diretor di skóla ô COSE di bu alunu pa email pa kumunika bus priokupason ô pa pidi un riunion ku Ekipa di IEP
- Kontakta Linha di Ajuda di MAC pa más orientason: (617) 357-8431
- Bu pode tanbe aprizenta un kexa na Dipartaméntu di Ensinu Báziku y Sekundáriu di Massachusetts. Pa sabe más sobri es prusésu, kontakta Linha di Ajuda di MAC ô kontakta DESE dirétamenti pa númeru 781-338-3700.

